

REGIONAL NEWS UNIT
ALL INDIA RADIO, AGARTALA
Date: 18-03-2024
Time: 07:55-08:05 PM Hrs
BENGALI EVENING BULLETIN

Headlines :

- (১) রাজ্যপাল ইন্দ্রসেনা রেডিও নাল্লু রাজ্যে উন্নত বীজ তৈরি করার জন্য গবেষণা অব্যাহত রাখতে রাজ্যের কৃষি বিজ্ঞানীদের পরামর্শ দেন ।
- (২) নির্বাচন কমিশন আজ ছয়টি রাজ্যের স্বরাষ্ট্রসচিব এবং পশ্চিমবঙ্গ পুলিশের মহানির্দেশককে অপসারণ করেছে।
- (৩) সুপ্রিমকোর্টের প্রধান বিচারপতির নেতৃত্বাধীন পাঁচ সদস্যের বেঞ্চ নির্বাচনী বন্ড নিয়ে যাবতীয় তথ্য প্রকাশ্যে আনতে আজ স্টেট ব্যাঙ্ক কর্তৃপক্ষকে নির্দেশ দিয়েছে ।
- (৪) টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতার আজ সাতটি খেলা হয় ।

Governor :

রাজ্যপাল ইন্দ্রসেনা রেডিও নাল্লু রাজ্যে উন্নত বীজ তৈরি করার জন্য গবেষণা অব্যাহত রাখতে রাজ্যের কৃষি বিজ্ঞানীদের পরামর্শ দেন। আজ অরুন্ধতীনগরে স্টেট এগ্রিকালচার রিসার্চ স্টেশন পরিদর্শনকালে তিনি এই পরামর্শ দেন। স্টেট এগ্রিকালচার রিসার্চ

স্টেশনের কনফারেন্স হলে রাজ্যপাল কৃষি আধিকারিকদের সঙ্গে বিভিন্ন বিষয়ে মতবিনিময় করেন।

সেখানে স্টেট এগ্রিকালচার রিসার্চ স্টেশনের বিভিন্ন কর্মসূচির উপর একটি তথ্যচিত্র প্রদর্শিত হয়। মতবিনিময় সভায় যুগ্ম অধিকর্তা রিসার্চ স্টেশনের কর্মসূচি সম্পর্কে রাজ্যপালকে বিস্তারিতভাবে অবহিত করেন। পরে রাজ্যপাল এই স্টেশনের সিড মিউজিয়াম, ধান ও অন্যান্য শস্যের প্রদর্শনীমূলক চাষের জায়গা এবং জৈব পদ্ধতিতে উৎপাদিত ফসল চাষের এলাকা পরিদর্শন করেন। এরপর তিনি সিড টেস্টিং ল্যাবরেটরি, মোবাইল সয়েল টেস্টিং ভ্যানও পরিদর্শন করেন।

ECI :

লোকসভা নির্বাচনের আগে, নির্বাচন কমিশন আজ ছয়টি রাজ্যের স্বরাষ্ট্রসচিব এবং পশ্চিমবঙ্গ পুলিশের মহানির্দেশককে অপসারণ করেছে। গুজরাট, উত্তরপ্রদেশ, বিহার, ঝাড়খণ্ড, হিমাচল প্রদেশ এবং উত্তরাখণ্ডে স্বরাষ্ট্রসচিবদের সরিয়ে দেয়া হয়েছে। মিজোরাম এবং হিমাচল প্রদেশের সাধারণ প্রশাসনিক বিভাগের সচিবদেরও বদলি করা হয়েছে। এছাড়াও, বৃহৎমুষ্ণই মিউনিসিপ্যাল কমিশনার ইকবাল সিং চাহালের পাশাপাশি অতিরিক্ত কমিশনার এবং ডেপুটি কমিশনারদের অপসারণের নির্দেশ দেয়া হয়েছে।

DM visit - Strong room :

পশ্চিম ত্রিপুরা জেলা শাসক ডঃ বিশাল কুমার আজ উমাকান্ত একাডেমীতে স্ট্রং রুম ও কাউন্টিং হল পরিদর্শন করেন।

পরিদর্শনকালে ডঃ কুমার স্ট্রং রুমের সুরক্ষা ব্যবস্থার দিকটিও খতিয়ে দেখেন। তিনি বলেন, খুব শীঘ্রই সিসিটিভি ক্যামেরা সহ অন্যান্য সুরক্ষার সরঞ্জাম এসে পৌঁছুবে।

Workshop-Kailashahar :

কৈলাশহর সার্কিট হাউসের কনফারেন্স হলে আজ তৃতীয় লিঙ্গের নাগরিকদের আইনগত অধিকার বিষয়ে এক কর্মশালা অনুষ্ঠিত হয়।

কর্মশালায় প্রধান অতিথির ভাষণে ঊনকোটি জেলার জেলা শাসক দিলীপ কুমার চাকমা বলেন, তৃতীয় লিঙ্গের নাগরিকদের সামাজিক ও আইনগত অধিকার রয়েছে। ভোটার তালিকায় তৃতীয় লিঙ্গের নাগরিকদের নাম অন্তর্ভুক্ত হচ্ছে। ঊনকোটি জেলাতে দুইজন তৃতীয় লিঙ্গের ভোটার রয়েছেন। তৃতীয় লিঙ্গের নাগরিকদের সমাজে সম-অধিকার রয়েছে।

কর্মশালায় বিভিন্ন বক্তা বলেন, সুপ্রীমকোর্ট দেশে পুরুষ -মহিলার পাশাপাশি তৃতীয় লিঙ্গ কেও স্বীকৃতি প্রদান করেছে। "তৃতীয় লিঙ্গের নাগরিকদের অধিকার রক্ষা আইন" দেশে কার্যকর রয়েছে।

বক্তব্য রাখেন, সমাজ কল্যাণ ও সমাজশিক্ষা দপ্তরের জেলা পরিদর্শক বিদ্যাসাগর দেববর্মা, মনোরোগ বিশেষজ্ঞ ডাঃ কিষান দেববর্মা, তৃতীয় লিঙ্গ কল্যাণ পর্ষদের সদস্য স্নেহা গুপ্তা ধর প্রমুখ।

আজকের কর্মসূচিতে জেলা ও মহকুমাস্তরের প্রশাসনিক
আধিকারিকরা, চিকিৎসক ও আইনজীবীরা অংশ নেন।

সমাজ কল্যাণ ও সমাজশিক্ষা দপ্তরের জেলা পরিদর্শক বিদ্যা সাগর
দেববর্মা জানান, তৃতীয় লিঙ্গের নাগরিকদের অধিকার সম্পর্কে
সচেতনতা সৃষ্টির লক্ষ্যে এই কর্মশালার আয়োজন।

Biplab Deb-Sangothonik Boithok :

বিজেপি মান্দাই মন্ডলের উদ্যোগে আজ মান্দাই বাজারস্থিত খরাং
কমিউনিটি হলে এক সাংগঠনিক বৈঠক অনুষ্ঠিত হয়। উপস্থিত
ছিলেন পশ্চিম ত্রিপুরা আসনে বিজেপি মনোনীত প্রার্থী সাংসদ
বিপ্লব কুমার দেব, দলের সাধারণ সম্পাদক বিপিন দেববর্মা সহ
অন্যান্য কার্যকর্তাগণ। বৈঠকে বক্তব্য রাখতে গিয়ে সাংসদ শ্রী দেব
রাজ্যের জন্জাতিদের আর্থ সামাজিক উন্নয়নের উপর গুরুত্ব
আরোপ করেন।

Organisational meeting :

বিজেপি'র Election Management Committee-র এক বৈঠক
আজ আগরতলায় অনুষ্ঠিত হয়। বৈঠকে লোকসভা নির্বাচনের
দলের নির্বাচনী রণকৌশল নিয়ে আলোচনা হয়। উপস্থিত ছিলেন
অর্থমন্ত্রী প্রণজিৎ সিংহ রায়, প্রদেশ বিজেপি সভাপতি রাজীব
ভট্টাচার্য এবং দলের ত্রিপুরা ও আসাম প্রদেশের সংগঠন মহামন্ত্রী
রবীন্দ্র রাজু সহ অন্যান্য নেতৃবৃন্দ।

Supreme Court on electoral Bond :

সুপ্রিমকোর্টের প্রধান বিচারপতির নেতৃত্বাধীন পাঁচ সদস্যের বেঞ্চ নির্বাচনী বন্ড নিয়ে যাবতীয় তথ্য প্রকাশ্যে আনতে আজ স্টেট ব্যাঙ্ক কর্তৃপক্ষকে নির্দেশ দিয়েছে। এই নির্দেশে আরো বলা হয়েছে নির্বাচনী বন্ডের ক্রমিক নম্বরগুলি প্রকাশ্যে আনতে হবে এবং স্টেট ব্যাঙ্ক কোনও তথ্য অসম্পূর্ণ রাখেনি এই মর্মে একটি হলফনামা দাখিল করতে হবে। স্টেট ব্যাঙ্ক বলেছে, তাঁদের কাছে থাকা প্রতিটি তথ্য প্রদান করবো।" সুপ্রিমকোর্টের এই নির্দেশ অনুযায়ী আগামী বৃহস্পতিবার বিকেল ৫টার মধ্যে শীর্ষ আদালতে হলফনামা জমা দিতে হবে স্টেট ব্যাঙ্কের চেয়ারম্যানকে। স্টেট ব্যাঙ্ক নতুন তথ্য জমা দিলে ফের তা সরকারি ওয়েবসাইটে তুলে দেওয়ার নির্দেশ দেওয়া হয়েছে নির্বাচন কমিশনকে।

Dengue :

কেন্দ্রীয় স্বাস্থ্য মন্ত্রকের অতিরিক্ত সচিব লামচংগোই সুইটি চ্যাংসান ডেঙ্গুর বিরুদ্ধে লড়াইয়ে বহু-ক্ষেত্রভিত্তিক পরিকল্পনার উপর জোর দিয়েছেন। আজ নতুনদিল্লিতে ডেঙ্গু কনক্লেভে তিনি বলেন যে ডেঙ্গুর ঘটনা উদ্বেগজনক গতিতে বাড়ছে।

তিনি আরও বলেন, গত বছর দেশে তিন লক্ষ ডেঙ্গু আক্রান্তের ঘটনা নথিভুক্ত হয়েছে এবং তিনশ ৩৯ জনের মৃত্যু হয়েছে। তিনি জননিরাপত্তা এবং নগর পরিকল্পনার সকল অংশীদারদের আরও সমন্বয়ের সঙ্গে এবং ডেঙ্গুর বিপদ মোকাবেলায় দক্ষতার সাথে পরিকল্পনা করার আহ্বান জানান।

আকাশবাণীর সঙ্গে কথা বলতে গিয়ে তিনি জানান যে, দ্রুত নগরায়ন এবং জলবায়ু পরিবর্তন মশাবাহিত রোগের বিরুদ্ধে লড়াইয়ে চ্যালেঞ্জগুলিকে আরও বাড়িয়ে তুলেছে।

Election Campaign :

লোকসভা নির্বাচনকে সমানে রেখে আজ সোনামুড়ার কাঠালিয়া বাজারে পশ্চিম ত্রিপুরা লোকসভা আসনের কংগ্রেস প্রার্থী আশীষ কুমার সাহার সমর্থনে সি.পি.আই.এম-এর উদ্যোগে একটি সভা অনুষ্ঠিত হয়। সভায় কেন্দ্র ও রাজ্য সরকারের সমালোচনা করে বক্তব্য রাখেন সি.পি.আই.এম সিপাহীজলা জেলা কমিটির সম্পাদক প্রাক্তন মন্ত্রী ভানুলাল সাহা, বিধায়ক শ্যামল চক্রবর্তী, সোনামুড়া মহকুমা সম্পাদক রতন সাহা প্রমুখ। তাছাড়া সোনামুড়া বিধানসভা কেন্দ্রের বেজিমায়া এলাকায় বি.জে.পি'র উদ্যোগে এক নির্বাচনী সভা অনুষ্ঠিত হয়। উপস্থিত ছিলেন বিজেপি সংখ্যালঘু মোর্চার রাজ্য সভাপতি বিল্লাল মিয়া সহ অন্যান্য নেতৃবৃন্দ।

এদিকে, মজলিশপুর বিজেপি মন্ডলের উদ্যোগে আজ পশ্চিম ত্রিপুরা আসনের বিজেপি প্রার্থী বিপ্লব দেবের সমর্থনে রানিরবাজার ও জিরানিয়ায় দুটি নির্বাচনী সভা অনুষ্ঠিত হয়। উপস্থিত ছিলেন পর্যটনমন্ত্রী সুশান্ত চৌধুরী।

Pinaki das chwdhury :

যান দুর্ঘটনায় আহত বিধায়ক পিনাকি দাস চৌধুরী জিবি হাসপাতালে চিকিতসায় অনেকটা সুস্থ হয়ে উঠেছেন। তিনি

নিজেই সামাজিক মাধ্যমে আজ এই খবর জানিয়েছেন। তিনি আরও জানান, সকালে ছোট একটি অপারেশনের জন্য বিমানে বাইরের রাজ্যে গেছেন। জিবি হাসপাতালে ব্যক্তিগত দেহরক্ষীর চিকিৎসা চলছে। আহত গাড়ি চালক মোটামুটি সুস্থ হয়েছেন বলে তিনি জানান।

NSS Special Camp-Sabroom :

সাব্রুম মাইকেল মধুসূদন দত্ত কলেজের সপ্তাহব্যাপী জাতীয় সেবা প্রকল্পের বিশেষ শিবির আজ শেষ হয়েছে। সপ্তাহব্যাপী এই শিবির চলাকালে রক্তদান উৎসব, নেশা মুক্তি নিয়ে, পোস্টার প্রদর্শনী ও আলোচনা সভা, পরিবেশ বান্ধব কর্মসূচি, ছাত্রছাত্রীদের মধ্যে অঙ্কন প্রতিযোগিতা, কলেজ ক্যাম্পাস ও সাব্রুম শহরে পরিষ্কার পরিচ্ছন্ন করার কাজে হাত লাগায় কলেজ ইউনিটের স্বেচ্ছাসেবক সহ অধ্যক্ষ, শিক্ষক ও শিক্ষাকর্মীরা। কলেজের জাতীয় সেবা প্রকল্প ইউনিটের অধিগৃহিত গ্রাম দমদমা পঞ্চায়েতে স্বাস্থ্য শিবির করে স্বাস্থ্য সচেতনতা বিষয়ক আলোচনা এবং সরাসরি চিকিৎসার সুযোগ গ্রামের নাগরিকদের প্রদান করেন চিকিৎসক ও স্বাস্থ্য কর্মীরা। আজ বিশেষ শিবিরের সমাপনী অনুষ্ঠানে কলেজের অধ্যক্ষ ডঃ অনুপম গুহ ও অধ্যাপক ডঃ কমল আচার্য, সাব্রুম গার্লস হায়ার সেকেন্ডারি স্কুলের প্রধান শিক্ষক রঞ্জন দেবনাথ প্রমুখ উপস্থিত ছিলেন।

Saraswati Samman :

প্রখ্যাত কবি প্রভা বর্মাকে মালায়ালাম ভাষায় তাঁর কাজের জন্য ২০২৩ সালের সরস্বতী সম্মান প্রদান করা হবে। তিনি তাঁর মালায়ালম ভাষার কবিতা রচনা, রৌদ্র সাথবিকম এবং ২০১৩ থেকে ২০২২ সাল পর্যন্ত সাহিত্যে তাঁর অবদানের জন্য এই সম্মান পাচ্ছেন। সম্মাননা হিসেবে তাঁকে একটি সম্মাননাপত্র, একটি ফলক এবং পনের লক্ষ টাকা দেয়া হবে।

IGNCA :

ইন্দিরা গান্ধী ন্যাশনাল সেন্টার ফর আর্টস, IGNCA এর ৩৭তম প্রতিষ্ঠা দিবস আগামীকাল থেকে নতুনদিল্লির IGNCA প্রাঙ্গণে উদযাপিত হবে। তিন দিনব্যাপী এই অনুষ্ঠানে শাস্ত্রীয় সঙ্গীত, বাদ্যযন্ত্র, নাচ, ফুলের হোলি, কর্মশালা সহ বিভিন্ন অনুষ্ঠানের আয়োজন করা হবে। জনসাধারণ বিকাল ৫টা থেকে এই অনুষ্ঠানে বিনামূল্যে প্রবেশ করতে পারবেন।

আজ এক সাংবাদিক সম্মেলনে আর্ট সেন্টারের চেয়ারপারসন প্রফেসর রিচা কাশ্বোজ একথা জানান!

Drug :

গত ২৪ ঘন্টায় রাজ্যের বিভিন্ন এলাকা থেকে পুলিশ প্রচুর পরিমাণ নেশা সামগ্রী আটক করেছে। বিমানবন্দর থানার পুলিশ উষা বাজার এলাকা থেকে সাড়ে ৬ গ্রাম হেরোইন সহ একটি স্কুটি আটক করেছে। উত্তর জেলার পানিসাগরের তিল থৈ এলাকা থেকে পুলিশ গতকাল সন্ধ্যায় ১.৬ গ্রাম হেরোইন এবং ৯৯৬টি ইয়াবা ট্যাবলেট আটক করেছে। মেলাঘরের তেল কাজলা এলাকা

থেকে পুলিশ এক দশমিক ২৫ গ্রাম হেরোইন, ৩০০ ইয়াবা ট্যাবলেট এবং এক কেজি ৯০০ গ্রাম গাঁজা আটক করেছে। তাছাড়া তেলিয়ামুড়া রেল স্টেশন থেকে জিআরপি ১২৮ বোতল কফ সিরাপ আটক করেছে। এই ঘটনায় ধর্মবীর কুমার এবং আদিত্য কুমার নামে দুই ব্যক্তিকে আটক করা হয়।

State wise 13 Cricket :

টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতার আজ সাতটি খেলা হয়। এতে তেলিয়ামুড়ায় অনুষ্ঠিত খেলায় স্বাগতিক তেলিয়ামুড়া ৯ উইকেটে জিরানীয়াকে, নেপকো মাঠে সদর-এ ৭ উইকেটে বিশালগড়কে, বিশালগড়ের জাঙ্গালিয়া মাঠে সোনামুড়া ১২০ রানে আমবাসাকে, ধর্মনগরের কলেজ মাঠে কমলপুর ১৩৮ রানে গন্ডাছড়াকে, হাফলং মাঠে ধর্মনগর ৯ উইকেটে লংতরাইভ্যালীকে, উদয়পুরের কেবিআই মাঠে বিলোনীয়া ৭৬ রানে সাব্রুমকে এবং বিলোনীয়ায় অনুষ্ঠিত খেলায় শান্তিরবাজার ৪ উইকেটে অমরপুরকে পরাজিত করে।

Belonia Senior Cricket :

বিলোনীয়া মহকুমা ক্রিকেট এসোসিয়েশন আয়োজিত সিনিয়র ডাবল লীগ কাম নক আউট ক্রিকেট টুর্নামেন্টের পঞ্চম ম্যাচে আজ ইয়ুথ স্কোয়ার ক্লাব জয়ী হয়। বিদ্যাপীঠ মাঠে আয়োজিত ম্যাচে প্রথমে ব্যাট করতে নেমে ৫ উইকেটে হারায় নিউস্টার ক্লাবকে। টসে জিতে প্রথমে ব্যাট করতে নেমে নিউস্টার ক্লাব ২৮ ওভারে ৫ বলে ৭২ রান সংগ্রহ করে। জবাবে খেলতে নেমে ইয়ুথ

স্কোয়ার ৮ ওভারে ৪ বলে ৫ উইকেট হারিয়ে জয়ের জন্য
প্রয়োজনীয় রান তুলে নেয়।

Weather :

আগামীকাল আকাশ সাধারণত মেঘাচ্ছন্ন থাকবে। দুয়েক জায়গায়
বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা
রয়েছে। তাপমাত্রা সর্বোচ্চ চৌত্রিশ ডিগ্রী এবং সর্বনিম্ন একুশ
ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ
তাপমাত্রা ছিল বত্রিশ দশমিক আট ডিগ্রী এবং সর্বনিম্ন কুড়ি
দশমিক আট ডিগ্রী সেলসিয়াস। আগামী চব্বিশ ঘণ্টায় রাজ্যের
সব জেলায় বিক্ষিপ্তভাবে বজ্র বিদ্যুত সহ বৃষ্টিপাতের সতর্কতা
জারি করেছে আবহাওয়া দপ্তর।
